



Aqqalu C. Jerimiassen

UKA 2022/118

Atassut

05. oktober 2022

Uunga siunnersuut: Eqqumiitsuliornermik ingerlatsineq pillugu Inatsisartut inatsisaannut allannguutissatut siunnersuut.

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siunnersuut atuarlugu tupaallannalaanngitsuunngilaq, naak eqqumiitsuliortut atugaannik tapersersuiuartuugaluarluta, siunertaq kusanartoq equngalluinnartumik sangusoorsinnaasoq uppersarsillugu.

Illumummi eqqumiitsuliortatta atugaat qaffassartariaqarpagut ilaatigut suliaqarnermut tapiissutit, akileraartarnermut tunngasut kiisalu eqqumiitsuliornerup inuussutissarsiutitut isiginnittaasitta inerisarnissaa pillugu. Eqqumiitsuliornerulli inuussutissarsiutiginerulersinnaanissaanik oqariartuuteqartarnitsinni takorloorsimannngisaannarparput eqqumiitsuliortortagut aningaasanik tunioraannalernissaannut sangujartuaalissasugut.

Siunnersuuteqartup takorluugaa paasilluarsinnaavarput, ilisarnarluarporlu qallunaat nunaanni taamatut ataqqinaammik nersornaasiisarnermut assingusumik takorluugaqartoqartoq. Takujuminaatseqaarpullu massakkut nunatsinni eqqumiitsuliortut atugaat suli aqqitassaaruttortut ataasiakkaaginnarnut aningaasaleerujussuortoqarniarmat. Isumaqarpugullu aningaasat taakku eqqumiitsuliortorparujussuarnut amerlasuunut iluaqutaasinnaagaluartut.

Qallunaallu nunaanni taamatut ataasiakkaanut aningaasarsiaqartitsisoqartarpoq uku pissutsit atuummata: Eqqumiitsuliortut akileraartarnikkut pitsaasumik tulluarsakkamillu atugaqareerput, eqqumiitsuliorneq inuussutissarsiutitut akuerisaavoq atugaallunilu, tapiissutit tulluurtumik ingerlalluarput, Danmarkimilu aningaasaqarneq pitsarujussuulluni. Pissutsit taakku nunatsinni atuussimalerpata aamma taperseeqataasimassagaluarput.

Taamaanngilarli. Illumut eqqumiitsuliortortagut ”tapersersorniarlugit” aningaasarpassuarnik tunioraannarniarput? Illumut ”tapersersuiniarluta” ”siursaaniarlutalu” sisamaannaat iluaqutissaannik 10mio.nik aningaasaliiniarpugut? Illumut taakku ataasiakkaat aningaasalersorutsigit taakku suliaqarnerulissappat? Taamatut aningaasaliisoqassappat arlaatigut pisussaaffilerneqassappat sulianik aalajangersimasunik naammassinnittussanngorlugit?

Takorluulaartigu taakku 10mio. kr.-it eqqumiitsuliortorpassuarnit tamanit iluaqutaasussatut atorneqartuuppata, qanoq angusassat qanoq annertunerutigissanersut. Unneqqarillutalu

oqartariaqarpugut una siunnersuut eqqumiitsuliortunut ataasiakkaanut socialertutut pisortaniit pisartagaqartutut inissiinerussasoq.

Eqqumiitsuliortorpassuit atugaannik siuarsaaqataarusuppugut, taamaattorli inuit sisamaannaat atugassaannik ukiuni qulini 10mio. kr.-it atorpeqarnissaat itigartipparput.